



LE GOUVERNEMENT
DU GRAND-DUCHÉ DE LUXEMBOURG
Ministère de l'Environnement, du Climat
et du Développement durable

Äntwert vun der Ministesch fir Ëmwelt, Klima an nohalteg Entwécklung op d'parlamentaresch Fro n°8006 vum 19. Mee 2023 vun dem éierewäerten Deputéierten Här André Bauler iwwert "Construction d'une éolienne à Burden"

1. Wat sinn déi genee Krittären no deenen d'Entscheidung vum Ëmweltministère an dësem Kontext geholl gouf?

Administrativ Decisiounen sinn ëmmer am Kontext vun dem jeeweilige Gesetz ze gesinn. An dësem Fall applizéieren sech zwee Gesetzter aus dem Ëmweltberäich, déi jee weils hir spezifesch Objektivier hunn: d'Commodo-Gesetz an d'Naturschutzgesetz.

D'Commodo-Gesetz gesäit eng integrativ Approche bei der Präventioun an der Reduktioun vu Pollutiounen vir, déi duerch en Etablissement entstoen kënnen. Bäi Wandmille sinn déi wesentlech Pollutiounen de Kaméidi vun der Anlag an de Schiet, dee beim Dréine vum Rotor entsteet.

D'Bewäertungskrittäre vum Kaméidi am Kader vum Commodo-Gesetz sinn fir d'Wandmillen am Joresbericht 2013 vum Ëmweltdepartement beschriwwen. De Commodo-Dossier huet dës Virgaben och iwwerholl. De virgenannten Joresbericht ass iwwer Internet accessibel (<https://gouvernement.lu/fr/publications>). An dësem Kontext ass ze soen, dass et ugeduecht ass dës Krittären méttelfristeg op de Leescht ze huelen an, falls néideg, z'adaptéieren an ënner Form vun engem Guide un d'Etüdebüroen ze vermëttelen. Aktuell ginn et awer keng Unhaltspunkter, dass déi aktuell Krittären net méi de wëssenschaftleche Standarden géingen entsprechen.

Beim Schiet gëtt et keng spezifesch national Legislatioun. Am Kader vum Commodo-Gesetz gëtt sech un déi däitsch Approche ralliéiert, déi och am Dossier beschriwwen gëtt. Déi däitsch Approche gëtt am Dokument "Hinweise zur Ermittlung und Beurteilung der optischen Immissionen von Windenergieanlagen – Aktualisierung 2019 (WEA-Schattenwurf-Hinweise)" vum LAI (Bund/Länder-Arbeitsgemeinschaft für Immissionsschutz) präziséiert (<https://www.lai-immissionsschutz.de/>).

D'Krittären no deenen Decisiounen am Kader vum Naturschutzgesetz geholl ginn, si bei Wandmillen an der Reegel méiglech Impakter op d'Landschaftsbild, op den Aarten- a Naturschutz souwéi d'Präsenz vun Naturschutzgebidder, geschützte Biotoper, "habitats d'intérêt communautaire", asw.

Soulaang d'Wandmille keng signifikant Impakter op ënner anerem dës Krittären opweist, schwätzt näischt géint d'Implantatioun vun der Wandmillen. Sou huet d'Wandmille bei Bierden, soulaang d'Kompensatiounsmesuren an d'Ausgläichsmoosnamen (CEF-Mesuren) duechgefouert ginn, keng signifikant Impakter op den Aarten- a Naturschutz a kann naturverträglech ëmgesat ginn.

2. Wat fir Krittäre schwätze speziell fir de Site no bei Bierden? Wéi grouss ass d'Distanz par rapport zum Duerf Waarken an der Gemeng Ettelbréck?

No deenen zwee virgenannte Gesetzter muss de Ministère fir Ëmwelt, Klima an nohalteg Entwécklung fir ee Projet fir deen eng Geneemegungsfro virläit Decisiounen huelen, dëst op Basis vun sengem Ëmweltimpakt. Dobäi läit et net an der Kompetenz vum Ministère fir Ëmwelt, Klima an nohalteg Entwécklung fir iwwer d'Opportunitéit vum Projet ze jugéieren an e kann och keen Alternativsite vorschreiwen.



De Projet läit op 996 m zum éischten Haus vun der Agglomeratioun Waarken. Zwësche Waarken an der autoriséierter Wandmille sinn och nach eenzel Haiser fir där hire Schutz Betriibslimitatioune virgeschriwwen sinn.

3. Wat hunn d'Analysen a punkto Infraschall, Vulleschutz a Schiedfelder erginn?

D'Analysen hunn erginn, dass d'Auswierkungen vum Projet innerhalb vun den zoulässege Limitte leien, wann d'Grenzwärter (am Beräich vum Commodo) agehalen an d'Kompensatiounsmesuren an d'Ausgläichsmoosnamen (CEF-Mesuren) (am Beräich vum Naturschutz) ëmgosat sinn.

D'Commodo-Autorisatioun fixéiert d'Konditiounen zu den zoulässegen Auswierkungen wat Kaméidi a Schiet ugeet. Aktuell ginn et keng Erkenntnisser zum Infraschall bäi Wandmillen, déi géife spezifesch dofir Grenzwärter justifiéieren.

A punkto Natur- a Vulleschutz si virun allem d'Impakter op d'Aarte Roude Schéierschwanz a Léierchen relevant. Fir dës béid Aarte mussen am Kader vum Wandpark Bierden Ausgläichsmoosnamen ëmgosat ginn. Duerch déi Ausgläichsmoosnamen, déi musse fir d'Dauer vum Betrib vun der Wandmillen agehale ginn, kënnen signifikant Impakter op Aarten a Natur ausgeschloss ginn.

Des Weideren sinn ëmmer anerem d'Zwergfliedermaus, déi grouss Bëschfliedermaus an déi kleng Bëschfliedermaus vun der Implantatioun vun der Wandmille betraff. Duerch déi virgeschriwwen geziilt Ofschaltalgorithmen kann den Impakt vun der Wandmillen op dës Aarten ënnert d'Signifikanzschwell erof gesat ginn, sou dass net vun negativen Impakter op dës Aarte kann ausgaange ginn.

An dësem Fall goufen, wéi an änleche Fäll och, Léisungen gesicht a fonnt fir d'Installatioun am Respekt viru Mënsch an Natur ze realiséieren.

4. Ween huet dës Analysen duerchgefouert? Ginn d'Avise just vun engem Expert duerchgefouert oder ginn och aner Experten ëm hiren Avis gefrot fir eng zweet oder drëtt Meenung ze kréien?

D'Etudë zu Kaméidi, Schiet an Fauna sinn vun engem agréiertem Büroen erstallt ginn. Ausser dësen Etüden gouf nach eng Etüd zum Landschaftsimpakt duerchgefouert an een Dokument mat Detailer a Pläng zu Ausgläichsmoosnamen (CEF-Mesuren) ausgeschafft, inklusiv sämtleche Konventiounen mat de Besëtzer vu landwirtschaftleche Flächen.

D'Agreementer vun den zwee Etüdebureauen déi dës Dokumenter ausgestallt hunn baséieren op engem Gesetz vum 21. Abrëll 1993 (*loi du 21 avril 1993 relative à l'agrément de personnes physiques ou morales privées ou publiques, autres que l'Etat, pour l'accomplissement de tâches techniques d'étude et de vérification dans le domaine de l'environnement*).

Duerch en Agreement huet de Büro bestëmmten Obligatiounen anzehale fir d'Qualitéit vun den Etüden ze assuréieren. Informatiounen dozou ginn um Site www.emwelt.lu publizéiert (Ëmweltprozeduren - Agréments et Certifications).

D'Etüde ginn natierlech och vun den zoustännege Verwaltungen kontrolléiert. Bei engem Doute ginn Avisen vun aneren Experten gefrot, wat awer an dësem Dossier net de Fall war.

5. Ass den Ëmweltministère bereet fir d'Gespréich mat de Leit vu Bierden an och vu Waarken ze sichen?



LE GOUVERNEMENT
DU GRAND-DUCHÉ DE LUXEMBOURG
Ministère de l'Environnement, du Climat
et du Développement durable

De Ministère fir Ëmwelt, Klima an nohalteg Entwécklung ass net de Bauhär oder den Exploitant vun dëser Anlag. Et läit och net a sengen Kompetenzen d'Opportunitéit vun engem konkrete Projet ze jugéieren. En huet eleng e Projet, sou wéi e virläit, op seng Impakter op Mënsch an Natur ze bewäerten. Dëst ass an dësem Fall och geschitt.

Am Kader vun der Enquête publique nom Commodo-Gesetz haten d'Bierger d'Méiglechkeet, sech an d'Detailer vun der Demande anzuliesen an hir Observatiounen ofzeginn. Déi Observatiounen sinn all considéiert ginn iert eng Commodo-Décisioun geholl gouf.

Wéi schonn an der Äntwert op d'parlamentaresch Fro n°4246 vum Mee 2021 gesot, goufen et och Informatiounsreuniounen vum Bedreiwer vun der envisagéierter Anlag.

Sollt dem Ministère fir Ëmwelt, Klima an nohalteg Entwécklung en Alternativprojet virgeluecht ginn, sou géif dësen no den selwechten Krittären bewäert ginn an deem wär och an enger Enquête publique fir jiddereen anzegesinn.

Lëtzebuerg, den 27. Juni 2023

(s.) Joëlle Welfring

Ministesch fir Ëmwelt, Klima an nohalteg Entwécklung